



partii naleraq

10.maj 2016

UPA2016/68

Inatsisip atuutsinneqartup Naalakkersuisut kingusinnerpaamik UPA 2017-imi allanngortinnissaanut siunnersuummik suliniuteqaqqullugit siunnersuut. Taamaaliornikkut ilagiit sinniisaannut qinikkatut sulineq allatulli qinigaaffittut atuutilerseqqullugu. (Inatsisartunut ilaasortaq Anthon Frederiksen, Partii Naleraq).

Inatsisartunut ilasortaq Anthon Frederiksen Partii Naleraq siunnersuuteqarpoq tassalu ilagiit sinniisaassa qinikkatut allatulli qinigaaffittut atuutilerseqqullugu tamannalu Partii Naleqqamiit oqaaseqarfigissavarput.

Inuunermi timikkut tarnikkut anersaakkullu nukittuujunissaq pingaartorujussuusoq Partii Naleqqamiit oqaatigerusupparput.

Nunatsinni ilageqarnikkut atukkat ilaatigut pitsanngorsagassaasut oqaatigerusupparput, aammalu malunnartumik suliniarnikkut suliffigineqarnerisigullu pitsanngorsaaffigisariaqartut, pingaartumik ilagiinni sulisut sullissisullu eqqarsaatigalugit.

Ulluinnarni ilagiit suliniarfigineqarneranni qinikkanik sinniiseqarpugut tassalu ilagiit sinnisaat, qujanartumillu sulilluarnersigut ilaginnik sullissineq ingerlalluarpoq naak qinikkatut sulinermi taakku annertunerpaamik naalakkersuisut oqarnerattuut nammineq kajumissuseq tunngavigalugu sullissigaluartut, tassunalu nersugassapput, naak inuttut annertuumik pilliuteqarlutik ilaatigut ilagiinni suleqataanermi aqqusartagaat oqimaassinnaasaraluartut.

Ilagiit sinnisaat qinikkatut allatulli pisinnaatitaaffeqalernissaanik siunnersuuteqartup saqqummiussaa tamakkiisumik isumaqatigaarput.

Ukiuni makkunani ilagiit sinnisaat illoqarfinni nunaqarfinnilu naliginnaalernikuuvoq ilaatigut amigarlutik qinikkatut sulisarnerat, tassa qinigaagaluartunut periarfissaluttarneq pissutigalugu ilaasortaanermi tunuarmata, tamannalu soorunami ilungersunarpoq, siunissamilu taamatut ingerlaannassagutta ernumanissamut pissutissaqarpugut, taamaattumik ilagiit sinniisaasa sulinerat nukittorsaaffigisariaqarpoq.

Ilagiit sulissaminnik amigaateqarnerat ukiuni makkunani malunnarluarpoq, tassami illoqarfiit palasissaaleqisut arlaqarput, taamatullu aamma ajoqit pattattullu amigaatigineqarlutik. Aammalu ilagiit suliniarfigineqarneranni sulisunut atugassaritneqartut soorlu palasit illui aamma

nutartigassaapput tassami aserfallakkiartuinnartuni najugaqarluni suliniarneq aamma ilungersunarartuinnartarmat.

Ilagiit nunatsinni suliniarfigineqarnerat isigigaanni ilaatigut oqitsuinnaanngitsumik suliaqartarnerat takuneqarsinnaavoq, oqaluffiit aserfallalluinnarsimasut illoqarfinni nunaqarfinnilu naammattuugassaapput, ukiorpannilu aserfallaatsaalineqarnissaanik kissaateqartuarnert ajoraluartumik angusaqarfiuallaarneq ajorpoq aningaasanik amigaateqartarneq pissutigalugu.

Ilagiit sinnisaat qiviassagaanni malunnartumik sullissisut tassaapput utoqqanngulersut utoqqaallu tamannalu soorunami qujassutissaavoq namminneq soqutiginnillutik suliniarmata.

Siunissami ilagiit suliniarfigineqarneranni sulineq soqutiginarsarneqartariaqarpoq, tassalu inuusunnerusut nalinginnaasumik sulinermt peqataalersillugit, kisiannili ukiuni makkunani sulineq aningaasanik pissarsinngikkaanni soqutiginnittunut killeqaleriartuinnartoq malunnarsartuinnarpoq, tamannalu soorunami aamma tupinnanngilaq tassami aningaasaateqanngikkaanni massakut akiligassanik akilersuisoqarsinnaanngimmat.

Taamaattumik ilagiit sinniisaani sulineq aamma kajumissuseqarfigineqassappat qinikkatut allatulli aningaasarsiaqarsinnaanerart eqqunneqartariaqarpoq taamaattumik siunnersuuteqartup Anthon Frederiksen-ip Partii Naleraq siunnersuutaa taperserparput, ataatsimiititaliamilu suliarineqarnissaa innersuussutigalugu.

Hans Enoksen